

Powšitkowne WOZJEWJENJA

njedźelu, 29. awgusta 2010

Swójbne popołdnjo na Kukowskim hrodzišću

Dekanatne dušepastyrstwo přeprašuje tutu njedźelu, 29. awgusta, na swójbne popołdnjo na Kukowske hrodzišće. Započatk je w 14.30 hodź. z nyšporom, kotryž wobrubja šole z našich wosadow. Přizamknje so swačina. Po tym zhoniće wot fararja Šćěpana Delana a teama dekanatneho dušepastyrstwa zajimawostki wo Alojsu Andrickim. Hry a zaběra za džěci budu spřihotowane.

Wosebita zběrka za Pakistan

Katolska cyrkej w Němskej chce za wopory powodźenja w Pakistanje swójsku zběrku přewjesć. Kolekta ma so po cyłej Němskej na wšitkich Božich službach njedźelu, 5. septembra, tež na předwječornych, přewjesć. To zdžěli Němska biskopska konferenca srjedu, 25. awgusta, w Bonnje. Mjezynarodna pomoc je drje zaběžala, rěka w namołwje biskopow. Ale přeco hišće njeje dosć pjenjez, zo „by so znajmjeńša najhóršej nuzy wotpomhało“.

Wulět dekanatneje młodžiny

Dekanatne dušepastyrstwo přeprašuje młodostnych na lětuši zhromadny wulět njedźelu, 5. septembra. Bus wotjědže w 12.30 hodź. w Radworju pola Šmitec. Wón zastanje w 12.50 hodź. w Baćonju, w 12.55 hodź. w Chróscicach, w 13.00 hodź. w Pančicach-Kukowje na busowym zastanišću před šulu, w 13.10 hodź. w Njebjelčicach a pojedže do Njedźichowa na nyšpor. Dalši bus wotjědže w 13.00 hodź. z Kulowa do Njedźichowa.

Nimo wjele mocow měli sej wšitcy kupansku drastu kaž tež drastu za měnjenje sobu wzać. Kupanska drasta je tež při špatnym wjedrje trěbna. Přizjewić móža so zajimcy hač do pónđzele, 30. awgusta, w Don Boskowym domje we Worklecach, telefonowe čisło (03 57 96) 9 55 95, abo na Chróšćanskej farje (03 57 96) 8 04 00. Za wudawki dnja hromadža so wot kóžděho sobujěduceho 15 eurow. Nawrót budže wokoło 19 hodź.

Zetkanje samostejacych

Samostejacy ze serbskich wosadow su na zetkanje štwórtk, 16. septembra, w 14 hodź. do Domu biskopa Bena w Smochćicach přeprašeni. Zajimcy njech so hač do srjedy, 8. septembra, w redakciji Katolskeho Posoła přizjewja, telefonowe čisło (0 35 91) 55 02 12. Štóž chce wotewzaty być, njech to prošu zdžěli.

Zhromadnej dnjej za 7. a 8. lětnik

Dekanatne dušepastyrstwo přeprašuje šulerki a šulerjow 7. a 8. lětnika wot pjatka do soboty, 10. do 11. septembra na zhromadnej dnjej na Kukowske hrodzišće. Zajimcy njech so prošu hač do wutory, 7. septembra, pod telefonowym čislom (03 57 96) 8 87 07 we Worklecach přizjewja.

Zetkanje putnikow do Krupki

Wšitcy, kotřiž su lětsa do Krupki putnikowali, su přeprašeni na zhromadny wječor. Zetkanje wotměje so pjatk, 10. septembra, po wječornych kemšach w Chróscicach na farje. Boža mša je w 19 hodź.